



ԵԿԵՂԵՑԱԿԱՆ ՎԵՐԱՆՈՐՈԳՉԱԿԱՆ ԱՇԽԱՏԱՆՔՆԵՐ ՎՐԱՀԱՅՈՑ ԹԵՄՈՒՄ

Վրահայոց թեմի առաջնորդ տ. Գևորգ եպս. Սերադարյանը 1978 թվականի փետրվար 21 թվակիր իր գրությամբ Վեհափառ Հայրապետին հաղորդում էր վրահայոց թեմում 1977 տարվա ընթացքում կատարված եկեղեցական վերանորոգչական հետևյալ աշխատանքների մասին:



Նորանայտ որմնանկար Թբիլիսիի ա. Գևորգ Մայր եկեղեցու արևելյան մասի առաստաղին:
Հայտնաբերված 1977 թ. եկեղեցու վերանորոգության ժամանակ

Վեհափառ Տե՛ր.

1977 թվականը վրահայոց եկեղեցիների համար եղավ վերանորոգության տարի: Եկեղեցիների գործադիր մարմինների նախագահները 1977 թվականի սկզբին կատարեցին եկեղեցիների մասնակի և ամբողջական վերանորոգություններ՝ ըստ հետևյալի.

Սխալցխայի ա. Գրիգոր Լուսավորիչ եկեղեցի

Ներքին և արտաքին մասնակի վերանորոգություններ, որոնք լրիվ ավարտված են: Կատարված է նաև եկեղեցու ճանապարհի նոր մայթի կառուցումը եկեղեցու ծախսով:

Սխալքալարի ա. Խաչ եկեղեցի

Այս եկեղեցու արտաքին վերանորոգությունները, ինչպես նաև շրջակայքի բարեգարդումը կատարվեցին տեղական իշխանության ծախսով: Վերացվեցին եկեղեցու շրջակայքում գտնվող խարխլված տները և նրանց փոխարինեցին ծաղկանոցները: Բարեգարդ եկեղեցին այժմ գոհարի մասն էր շուր է տալիս քաղաքին:

Եկեղեցու միջոցներով կատարվեցին միայն ներքին խիստ անհրաժեշտ մասնակի վերանորոգություններ: Մնում է միայն ջեռուցման հարցը, որը նույնպես կլուծվի այս տարի կենտրոնական ջեռուցում անցկացվելու միջոցով:

Թբիլիսիի ա. Էջմիածին եկեղեցի

Վերջին անգամ վերանորոգվել է 1945 թվականին: Եկեղեցու պատասխանատու անձինք և հավատացյալներից ոմանք խնդրեցին չփոխել եկեղեցու ներքին տեսքը: Եկեղեցու վերանորոգության ներքին և

արտաքին աշխատանքները կատարվել են ըստ հետևյալի.

1. Էլեկտրական լարերի անցկացում պատերի միջով.

2. Ներքին պատերի յուղաներկ վերանորոգություն.

3. Որմնանկարների մաքրում.

4. Սեղանի մարմարապատում.

5. Եկեղեցու ներքին արևմտյան մասի հատակի պարկետապատում.

6. Վերնատան նորոգություն և պարկետապատում.

7. Եկեղեցու տանիքի թիթեղապատում (հնկե թիթեղներով):

Գնված են նաև վայելույ մոմակալներ, մեկ բյուրեղապակյա ջահ և մեկ էլեկտրական երգեհոն:

Պատերի ներկման գլխավոր աշխատանքները կատարեցին 1945 թվականին եկեղեցին վերանորոգող երկու վարպետները:

Թբիլիսիի ս. Գևորգ Մայր եկեղեցի

Եկեղեցու վերանորոգության սկզբնական աշխատանքների ժամանակ մասնագետները, պատերի յուղաներկի հին շերտերը մաքրելիս, հայտնաբերեցին հալկական ոճով գեղեցիկ մեծադիր որմնանկարներ: Եկեղեցու պատերի կեսը քերվեց և հայտնաբերվեցին տասը այդպիսի մեծ որմնանկարներ: Պարզվեց նաև, որ նախկինում պատերի ֆոնը նկարված է եղել տուֆ քարերի շարվածքի ձևով: Որոշվեց եկեղեցուն տալ նորահայտ պատմական տեսքը, և մասնագետները վարպետությամբ լույս աշխարհ բերեցին անթելված, մոռացված հոգևոր հարստությունները:

Եկեղեցու կեսը, արևելյան պատից մինչև գմբեթի արևմտյան կողմը, լրիվ վերանորոգված է: Տասը որմնանկարները թարմացվեցին կտավատի յուղով, իսկ թափված տեղերը լրացվեցին վերանորոգությամբ:

Նորահայտ տասը որմնանկարները հետևյալներն են.

1. Ս. Սեղանի կիսակող առաստաղին՝ Քրիստոսը բազմած ամպերի վրա, ձեռքին՝ մագաղաթ. «Գնացեք, այսուհետև աշակերտեցեք զամենայն հեթանոս» գրությամբ: Երկնքում՝ աղավանկերպ ս. Հոգին և սերովքներ:

2. Ս. Սեղանի կամարի ձախակողմյան մասում՝ ս. Աբգարի որմնանկարը՝ Քրիստոսի անձեռագործ դաստառակը ձեռքին: Կա նաև հայերեն արձանագրություն.

«Սուրբ Աբգար նախահաւատ թագաւոր հայոց»:

3. Ս. Սեղանի կամարի աջակողմյան մասում՝ սուրբ Տրդատի որմնանկարը: Արձանագրությունն է. «Սուրբ Տրդատ անդրանիկ թագաւոր հայոց»:



Նորահայտ որմնանկար Թբիլիսիի ս. Գևորգ Մայր եկեղեցու վերանորոգության ժամանակ. 1977 թ.

4. Հյուսիսային պատի կամարին՝ երկու զույգ սերովքներ երկնքում:

5. Հյուսիսային պատի արևմտյան մասում՝ Ավետումը (ս. Կույս Մարիամի):

6. Հյուսիսային պատի արևելյան մասում՝ Եղիաքեթը ողջունում է սուրբ Մարիամ Աստվածածնին:

7. Հյուսիսային կամարի արևմտյան մասում՝ սաղմոսասաց Դավթի հալածումը Սավիոյ թագավորից:

8. Հարավային պատի կամարին՝ երկու զույգ սերովքներ երկնքում:

9. Հարավային պատի արևելյան մասում՝ Քրիստոսի Ծնունդը:

10. Հարավային պատի արևմտյան մասում՝ Քրիստոսի Մկրտությունը:

Առայժմ (եկեղեցու առաջին կեսից) հայտնաբերված վերոհիշյալ տասը մեծադիր որմնանկարները ավելացան տասնութ մեծադիր այլ որմնանկարներին, որոնցից չորսը պատկանում է նկարիչ Գևորգ Բաշինջաղյանի վրձինին:

Նոր հայտնաբերված որմնանկարների ոճից ելնելով, մասնագետները ճշտեցին, որ դրանք պատկանում են Հովնաթան Հակոբի Հովնաթանյանի վրձինին, 18-րդ դար: Վերանորոգչական աշխատանքները շարունակվում են: